

Gulivaziun da finanzas gea – dentant betg uschia

In comité independent lantscha il referendum cunter la gulivaziun da finanzas sancziunada dal cussegl grond

DA MARTIN CABALZAR

■ **Gia en la debatta parlamentara en il cussegl grond avevan deputads liberaldemocrats ord l'Engiadina Auta smanatschà cun il referendum. Uss è la smanatscha daventada realitad. In comité independent cun deputada Claudia Troncana (pld Silvaplauna) ed il suppleant da deputà Luzi Schucan (pld Zuoz) a la testa ha lantschà il referendum.** Sco quai che *Claudia Troncana* e *Luzi Schucan* sincereschan consista quest comité «independent e neutral» da represchentants da differents partidas, dal mastergn e da la hotellaria. Per il comité è la gulivaziun da finanzas planisada «ina construcziun fallada che maina ad eclatantas sfalsificaziuns che na pon betg vegnir acceptadas». Ella saja plinavant memia chara. Il cussegl grond haja manchentà da far las correcturas correspundentas.



Gia en il cussegl grond aveva la deputada liberaldemocratica d'Engiadina Auta Claudia Troncana opponì a la proposta per ina Nova gulivaziun da finanzas.

FOTO O. ITEM

Engiadina Auta presta 8 milliuns per la solidaritad chantunala

Tenor il parsura da la Partida liberaldemocratica d'Engiadina Auta Luzi Schucan è la Nova gulivaziun da finanzas in construct fallà e consequentamain stoppia ses effect vegnir mess en dumonda. Singuls progress vegnian cuntanschids mo per grevezza da novs sbagls che mainian a grondas sfalsificaziuns da la concorrenza. Per quest intent hajan ins fundà il comité da referendum «Gulivaziun da finanzas – uschia betg». Il comité che consistia da represchentants da differentes partidas, da circuls da mastergn e da la hotellaria vegnia era sustegnì da la gronda part da las vischnancas d'Engiadina Auta.

La presidenta communal da Silvaplauna Claudia Troncana è da l'avis

ch'il chantun Grischun disponia gia oz d'ina gulivaziun da finanzas effizienta. Uschia prestia l'Engiadina Auta gia fin qua ina contribuziun da prest 8 milliuns francs a favur da la solidaritad entaifer il chantun.

Center profita a donn e cust da la periferia

Tenor Claudia Troncana stoppia ina gulivaziun da finanzas rinforzar cuntant las vischnancas main bain situadas a la periferia e betg ils centers. La

proposta per la nova gulivaziun da finanzas prevedia ch'ils meds supplementars mess a disposiziun portian grezzas supplementaras cuntant al chantun, a l'Engiadina Auta ed a la Val Müstair e quai cun ina sperdita da totalmain 22,5 milliuns. La mesadad da questa summa flessegia en las regiuns dal Grischun dal nord ed en la region dal Signuradi e dals Tschintg Vitgs, pia en ils centers economics da noss chantun. Bunamain 10 milliuns u 44 pertschient vegnian repartids sin suletta-

main sis vischnancas, numnadamain Cuira, Landquart, Vaz-sut, Poschiavo, Domat ed Arosa. Cun excepziun da Landquart (100%) èn quai tut vischnancas cun in pe da taglia sut 100 pertschient. Il rinforzament dal center e da las vischnancas economicamain fermas cuntrafetschia al princip da solidaritad, ha accentuà Luzi Schucan.

Mecanissem da quintar dispitaivels

Il sistem tschernì per eruir la forza fi-

nanziala e per fixar las contribuziuns da gulivaziun maina tenor Luzi Schucan ad ina gronda sfalsificaziun. Uschia possia la depopulaziun en ina regiun manar ad in augment imaginà dal potencial da resursas ed uschia effectuar pli grondas grevezzas per las vischnancas perturgadas. Tar questas sfalsificaziuns vegn anc che las contribuziuns a scolas pitschnas en la periferia vegnan reducidas per duas terzas e che las scolas medias vegnan adina dapli sut squitsch da las midadas previdas.

Il chantun metta a disposiziun 21,7 milliuns francs

Damai ch'il chatun mettia a disposiziun supplementarmain 21,7 milliuns francs daners da taglia a favur da la gulivaziun da finanzas manchian quels tar autras incumbensas sco la sanitad publica, las infrastrukturas per sport e temp liber, per la cultura etc., constatescha la deputada Claudia Troncana. Ella è persuadida che quai mainia ad in ulteriur squitsch da spargn e chaschunia novs problems en secturs anc betg enconuschents.

Tenor Troncana ha il cussegl grond deplorablamain manchentà en la sesiun da december 2013 da meglierar il sboz preschentà che cunteneva plirs sbagls e n'era betg madirà avunda. Enstagl d'examinar a moda critica la proposta fatga da l'administraziun e d'analisar e curreger ils effects negativs da la proposta da la regenza sin vischnancas periferas haja il cussegl grond simplamain dà glisch verda ad ina proposta, malgrà che quella cunteneva blers sbagls. Il comité da referendum è cunter questa refurma da la nova gulivaziun da finanzas. «Memia bler è anc avert, intransparent, betg sclerì e maina en la direcziun fallada.»